

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA FEOLOLO



AUKUSO - TESEMA

2019

AOKUSO 11, 2019

MATAUPU 1: “NA LĒ ILOA A UA MAUA, (Lost and Found).

TUSI FAITAU: LUKA 15: 1 – 10

SINI: Ia malamalama le fanau i le tāua o se mea e lē iloa ae toe maua.

UPU TOMUA: E mua’i faatalofa atu i Faiaoga o le vasega Feololo o lenei tausaga i le Suafa manumalō o lo tatou Alii o Iesu Keriso, tainane alo ma fanau a le EFKAS. Malo le folau, talofa lava. O le mataupu o lenei taeao ua tatou malamalama ma masani foi i mea e lē-iloa ona saili lea ma toe maua. Ua masani ai fale-faigaluega e faaputu i se potu po o se fata mea ua lē iloa, ona tusi ai lea o le upu; “*Lost and Found.*” E tali faapena le agaga o le mataupu, o mea na lē iloa a ua toe maua ona o se sailiga na faia, o lagona faagaetia o le tagata e ana le mea na lē iloa ae toe maua.

FOSOASOANI MO LE MATAUPU: Fai mai na valaau le tasi taulealea i le faifeau, ina ua tumu le fale sã, pe a ma le 100 le autalavou ua o mai i le faafiafiaga a le lotu. “A e a pe a tatou ò e su’e mai le to’a tolu pe to’a fa o loo taamimilo solo?” O se fesili tofotofo, auã ua latou iloa lelei e lē nofonofa le faifeau a e muamua foi e tata’i le ala. E manatua lelei e taulele’a le lauga a le faifeau: “matou te le’i o mai e tutu i tua o pulela’a ma feéi atu ia te outou; “Ina ia aumai iinei ē ua agasala, ia faaalua lo latou salamō ma to’atuli i le fata-faitaulaga.” E tataua ona matou ò i fafo atu o pulela’a e saili ma talanoa i e ua agasala. Ua iloa lelei e faifeau mea e saili muamua ai; i totonu o se pa, o lalo o le ala-laupapa, fesaga’i ma le au-ala o nofoa-afi, ia po o le fale tuu oloa tuufua. E manino le toe maua uma ai.

Ae faamata o le aumaia i le faafiafiaga a le lotu i lenei afiafi o se mea lelei lea mo i latou? Atonu o le a alo ése mai se inugā pia po o sina mariuana mo sina po e tasi o le a fesoasoani. Afai foi e ulufale Iesu i soo se ata e valaaulia ai, o le a ia faafeiloai pei o se uo lelei, pupula alofa, o itu-aiga o tupulaga talavou o loo tausoa se miti e tasi, o manatu ma lagona tutusa i faafitauli, peita’i ua sauni e mulimuli atu i isi ala aga’i i fafo atu o le li’o masani, e saili i nisi o tali, ia maua ai se malosia e faato’ilalo ai le faigatā ma lagolago i se faamoemoe fou.

Ia, na alualu lelei lava si faafiafiaga a le lotu i lea po. Na manaia le musika, maualuga foi leo o le faaili, ese foi le ola o le mafutaga i le faatoaga a le lotu seia oo i le tu-lua o le po. Fai mai a’o tapena le sui mulimuli e tuúa le faafiafiaga, o le tasi o tauleale’a na tau saili e le faifeau i lea po ua alu ane ia te ia ma fai ane. ‘Lau susuga i le faifeau, na matou ita tele i lau susuga ina ua matou vaai mai ua e alu atu mo i matou.’ Peita’i, e manaia si mea lea. O le a matou toe o mai foi i le isi faafiafiaga a le tatou lotu.

AOKUSO 18, 2019

MATAUPU 2: O LE TALA LELEI MO TAGATA UMA (Good news for all).
TUSI FAITAU: MAREKO 13: 3 – 13.
SINI: Ia mae'a le mataupu ua malamalama le fanau, o le tala lelei ia Iesu Keriso e mo tagata uma o lenei olaga.

FAATOMUAGA: E pei ua avea le oti, o le atuatuvaile, le fefe, o taua ma mala faa-le natura ua fai ma nisi o mea ua faapopoleina ma maua ai le loto lē mautonu o le tagata i lenei lalolagi fesuisuia'i. Ua tau saili ai se mapusaga po o se malosiaga e sulufa'i i ai le ua puapuagatia e la'a ai pea i luma. Peita'i, e ao ona faamanatu mai pea le ma'ale'ale o lalolagi ma le savaliga faa-le agaga o tatou tagata i le Alii. O le filifilia e fai ma avefe'au faamaoni ua valaauina e faasoa atu le tala lelei tusa lava pe faigata le si'osi'omaga. O le feau tauologologo e ao ona tumau ai le avefe'au e oo i le muta'aga o mea uma. O le miti mo le lalolagi filemū ae lē o le fetaua'i. E lē taumate ai lagona ae manino le faaolaina.

FESOASOANI MO LE MATAUPU: O le faamanatu a Mareko le mata'utia o le atuatuvaile o ona taimi. I le puaina mai o le lalolagi uiga ese: mai le fetaua'i e aga'i atu i nofoaga filemū; mai le lalolagi lē tutusa aga'i atu i le avea ma mea e tasi; mai le lalolagi itagia se'ia o'o atu i se lalolagi saputu ai le alofa. Ioe, e i ai le áu tete'e i lo tatou Alii o Iesu, e ao ona tatou puipuia o tatou sa'olotoga na saunia e le Atua mo lana fanau. E tatau foi ona mata'ala i ai le tala lelei ma avefe'au auā ne'i avea ma taulaga pei ona manatu i ai le lalolagi lē malamalama.

O ta'ita'i o le au-so'o ua latou fesiligia uiga ma le taimi e taunu'u ai mea ua valoia e Iesu. O lea ua ta'utino ai le Alii ma le faamautinoa o lo latou ala i mālo, ina ia tutumau ai pea lē ua filifilia e avea ma avefe'au o le Talalelei. Na manino lava le fetalaiga a Iesu; 'o lē avea ma so'o moni e galue se'ia oo i le oti.' O mea uma foi ua a'oa'oina ai i latou e moni lava ma le faamaoni le mau, ae ao lava ona latou tutūmau ai e oo i le gataaga. O sauaga foi ona o le tumau i le Talalelei, e lē o se mea faaleaogāina lo latou tautigā i le Alii, e faaolaina e faavavau i latou uma.

GALUEGA FAATINO: Fai ni nai fesili e faamalamalama atili ai le mataupu i le fanau.

1. O fea tonu na nofo ai Iesu e pei o le molimau a Mareko?

Tali: Na nofo o Ia i le mauga o Olive e feagai ma le malumalu.

2. O a mea na fia iloa e le au-soo i a latou fesili aga'i i le Keriso?

Tali: Ua latou fesiligia le taimi e taunu'u ai mea na valoia po o le gataaga?

3. O le a foi le faatonuga a le Alii i ona so'o e uiga i le tala lelei?

Tali: Ia latou muai tala'iina foi le tala lelei i nuu uma lava e ao ai.

SETEMA 01, 2018 “ASO SA O LE TALALELEI”

MATAUPU 4: “O FAAOSOOSOGA O LE TALALELEI,” (Tempting of the Good News).

TUSI FAITAU: LUKA 4: 1 – 13

SINI: Ia malamalama le fanau o ‘Iesu o le Talalelei’, ae na faaosoosoina lava e le ti’apolo.

UPU TOMUA: O le a taoto ia le ánofale o le tusi faitau ma le autū o lenei mataupu, ae se’i o’u faamanatu muamua lava le tāua o lenei aso faapitoa i le kalena a le au-kerisiano. E faasino i le o’o mai o le Talalelei i le atunu’u o Samoa. O le tausaga e 1830 na afea pe na suluia ai laufanua o Samoa i áve malolosi o le Talalelei, lea ua faamanatuina i lenei taeao le 189 talu ona taunu’u mai. O se aso iloga le tāua i le tala-faasolopito o le ekalesia ma le atunu’u i lenei taeao, ina ua o’o mai le malamalama o le Atua i laufanua o Samoa. O lea ua faa-talaleleiina ai le atunu’u, nu’u o aiga aemaise o tatou tagata taitoatasi i le galuega a Misionare mai Lonetona, tainane le taliaina e ta’ita’i o si o tatou atunu’u ma nai o tatou tuaā ua taoto mai i tiasā.

E faamanatu pea ma le agaga faafetai ona o le faautaga mamao a tuaā, lea ua manuia ai o tatou tupulaga i le Talalelei ia Iesu Keriso. E talitonu le manatu o lea se mafuaga ua o’oo’o mai ai i Samoa nei le faaolataga, pei ona suluia ai lau-fanua o le Atunu’u i ave malolosi o le Talalelei. O Iesu na fetalai, ‘e tatau ona folafola le talalelei i le malo o le Atua i áai uma.’ O le Talalelei ia Iesu Keriso lea ua sapi ma aeae ai tagata Samoa ma le lalolagi atoa i lona manuia e faavavau.

SU’ESU’EGA I LE TUSI PAIA: O le molimau a Luka i le fou amata o le galuega ‘Faaola’ a le Alii i le lalolagi. I le mataupu e 4 o loo amata i Kalilaia ma Nasareta le galuega tala’i ina ua mae’a ona ‘faaosoosoina’ o Ia e le ti’apolo. O le Talalelei ia Iesu Keriso e o mai faatasi ma fitā ma faigatā o le olaga nei. E i ai nisi e manatu a ta’u loa le Talalelei pe i ai faatasi ma Iesu i se mafutaga, o le a leai ni faafitauli e tula’i mai. Peita’i, o loo manino le molimau a Luka i le fou amata o le galuega a le Alii a e na taamilomilo ai fo’i ma le ti’apolo e faaosoosoina ma taumafai e taofia lenei galeuga tāua. O le galuega o le faaolataga na afio mai ai Iesu i le lalolagi.

O loo atagia i fuaiupu 3-12 le sauniga a le ti’apolo na faaosoosoina ai le Alii a’o fia taumafa lava o Ia. O le ata manino i le soifua i aso fai soo e fetaia’i pea le tagata ma faaosoosoga a le ti’apolo ma ana mailei. O loo faaaogā e le ti’apolo manaoga vaivai faa-le tagata e ui ane ai lana faaosoosoga i le Alii. ‘Ia fetalai ane i ma’a ina ia liu areto mo mea ái, o le pule ma le mamalu ae tau lava ina ifo atu; se’i oso ia i lalo a e poloai i ana agelu e tausi ia te Ia ne’i tu’ia lou vae i se ma’a’. Na faaaogāina e le Alii upu o le Tusi Paia e tali atu ai i le ti’apolo ma ana faaosoosoga.

SETEMA 08, 2019

MATAUPU 5: “IA FAALOGO I LE ATUA,” (Listen to God).

TUSI FAITAU: GALUEGA 7: 1 – 8

SINI: Ia malamalama le fanau e ao lava ona faalogo ma usita’i i le Atua.

UPU-TOMUA: O le tasi lenei o faatonuga tuu sa’o a le Atua mo lana fanau mo aso ma taimi uma o lenei olaga. Ina ia faalogo ma usita’i i lona finagalo paia. Po o a fitā ma ni faafitauli e o’o mai i le olaga nei e ao ona faalogo ma usitai i le Atua, e tusa foi lava pe oti ai.

FESOASOANI MO LE MATAUPU: O le tali a le auauna puapuagatia, o Setefano le ulua’i ‘mature’ o le Talalelei. O le leo e leai se fefe po o se sese auā o loo faamalosi au e le Agaga o le Atua ina ia faalogo ma usita’i i ai le tagata. E ui o feeseeseaiga e faaalua ai le aganu’u ma le va o gagana i le feagai ai o Kerisiano Iutaia ma Eleni ae maise tagata-nuu o Iutaia, na o le oti faa-mature na i’u i ai lana auauna o Setefano. O le fesili tele mo le avefeau o le Talalelei; ‘o le i’uga ea lea o le soifua ofoina atu mo Iesu ma lana galuega?’ A e faamata ua atoatoa ai le feau taologologo a le Atua na valaauina ai lana avefeau pe afai o lona taunu’uga lea?

O le tala na laualuga i le ‘Upu’ ma le aga-i-fanua ina ua fesiligia ma i’u ina lē toe faalogo i ai se tasi. Ina ua lalaga faatasi manatu e sa’o uma vaega e lua o le Talalelei ma le aganu’u, ua faigatā ai ona fai se faamasinoga tonu. O ai e faamasinoina le oti faa-mature o se avefeau o le Talalelei? E manatua pea le fatu o le ‘Upu’ na a’oa’oina ai i tatou, e mafai foi ona tatou ave le faamamafa i le mea sa’o, se alofa po o se faatuatua o i ai. O nisi ua manatu o le Talalelei po o le tala i le Atua e tāua ma telē atu nai lo ona manatu faatauva’a.

Afai lava e i ai se mea sili ona tāua i le tala logologoā ia Setefano ina ua tula’i mai, ona manatu lea i le faigatā o le amiotonu ma le faatumauiina o se mea i lenei olaga. Afai o ala o le Atua o le ‘ola’ mai le fatu o le ‘Upu’, e tatau foi ona tatou manatua o le Atua e faatonuina ma e lē ta’aia i totonu o nofoaga o tapua’iga po o se tusi foi. E lē telē atu ea le Atua nai lo tatou ola masani ma lo tatou molimauina o le ‘Upu’ faa-le agaga? O le amiotonu a le Atua e telē atu nai lo tatou iloa, ia faa telēina o tatou loto ma mafaufau ina ia tatou maua ai se vaega o lana amiotonu. O le moni o ‘Ou ala’ e faa-atoatoa ai le ola mo tagata uma.

GALUEGA FAATINO: Saili mai uiga o upu nei mai le tusi faitau ma nisi o upu e aiga faatasi:

- | | |
|-----------|-----------------|
| 1. mature | 4. tulagāvae |
| 2. anaana | 5. faapologaina |
| 3. mata’u | 6. peritome |

OKETOPA 27, 2019

MATAUPU 8: IA FAASAOINA LE TAGATA (Person Preservation).

TUSI FAITAU: LUKA 17: 20 – 37

SINI: Ia malamalama le fanau i le mafuaga e tatau ona faasaoina ai le ola o le tagata.

FAATOMUAGA: O le autū lea po o le manulauti o le galuega faaola a Iesu Keriso na auina mai ai e lona Tamā i le lalolagi; ‘ina ia faaolaina pe *faasaoina* le ola o le tagata mai le agasala.’ Ua manino le sailiga na mafua ona o le ola na puaina e le Atua i le tagata, faata’i na agasala le ulua’i tagata i le amataga. O le ala lea o le tu’ua o le nofoalii mamalu o le Atua e lona Alo e to’atasi, ae afio mai ina ia faasaoina lana tagata ma ia faaatoatoa ai le ola pei nai le amataga.

FESOASOANI MO LE MATAUPU: O le a le ola? E pei lava ua na o se vaega o le su’esu’eina o le tino. Ua si’omia i tatou i le tele o mea-óla, o nisi e tāua, nisi tatou te lē malamalama lelei i ai, a’o o le tele o nisi tatou te lē fesoota’i lava. Peita’i, e ta’u loa le ‘ola’ o le tagata, ona tatouvailiili lea o aganu’u ma aga-i-fanua o loo mamanuina, e faailoa mai po o le a le uiga o le maua o se ola tusaafia.

Fai mai le tasi alii tusitala e nofo i fafo atu o le auvaemauga i fale atia’e lelei o lona nu’u. O loo vaaia ai le tele o laupapa faailo e faailoa ai le maoa’e o le maketi, o le lelei ma le mautū o le faaaogaina o le tamaoiga ma le alualu i luma o le tomai faa konesuma mai Sasa’e, o le 21st seneturi i ia foi faasalalauga. O loo aumai se feau mai ia laupapa faailo e faapea; ‘e olaina ina ua i ai, e manino le mafai ona tatou olaina pe afai ua tatou maua.’ E pei o manatu lautele lava ia o le olaga, e fua foi le ola i le tamaoiga ma mea o le olaga nei ua foa’iina i o tatou lima.

SU’ESU’EGA I LE TUSI PAIA: E talanoaina pea, mo le au-mapo lotu le au faresaio lea na latou fesiligia Iesu pei ona tatou faitauina, ‘o le ola ina ia usita’i i tulafono a le Atua.’ E foliga mai, mo tagata na ta’ua e le Alii i taimi o Noa ma Lota, ‘o le ola - o lou faailoa lea o le ola.’ Auā e eseese tuā éleéle o loo tatou ola ai; e mafai foi ona fesili: ‘e faapefea le ola i le mea o loo e i ai?’ E mafai ona manatu i le o’o mai o le Malo o le Atua pei ona faatalia e le au-faresaio, pe o le ola i le vitau i lalo o le áta o le faamasnioga pei o augā tamā. Ua fetalai Iesu ia tu’ua mea uma ma ia lafoa’i tulaga ma mea tou te maua, auā o le ola moni o loo maua ia te Ia. ‘O sē saili ia saogalemū lona ola e maumau ai ia te ia, a o sē faamaumau ai e faasaoina e ia.’

GALUEGA FAATINO: Ia faapupula ma faalautele tala e lua pei ona aumaia e le mataupu:

- ❖ O le tala ia Noa ma le faasaoina mai le lolo.
- ❖ O le tala ia Lota ma le faasaoina mai e le Atua mai le afi ma le teiō.

NOVEMA 10, 2019

MATAUPU 10: “E MAMALU LE FALE ONA O LE TALI-MĀLO”, (The glory of a house is hospitality).

TUSI FAITAU: **ESOTO 25: 1 – 9**

SINI: **Ia malamalama le fanau o le mamalu o se fale e taoto i le agalelei faatali-mālo.**

FAATOMUAGA: O le tasi lea o manulauti a le aganu’u a Samoa o le faaáloalo ma le tausaaafia i malō po o tagata fai mai i si o tatou atunu’u, i totonu o nu’u faapea aiga. O le mafuaga foi lea e faa-ta’alaelae ai fale o tagata Samoa, ua na o pou ae leai ni puipui ma ni faitoto’a, auā e talia ma tali-malō i soo se tagata e ui ane i tafā-fale. O lima ua tatala atu ona o le alofa ma le agalelei i tagata fai-malaga ma fegasoloa’i, o le agaga ina ia aua ne’i alu loa le tagata malaga.

FESOASOANI MO LE MATAUPU: O le tala i le tasi tamaitai talavou faato’ā faatau lona ulua’i fale. E mai le tele o tausaga na nonofo faatasi ai ma uo, po o le nofo foi i fanua-o-íeafu, na tofo i ai ma na taupule ia lava mo se mokesi. Mo ia, o se laasaga tele i luga o le apeafa’i o mea totino. O le amataga i le faatumuina o se miti (e faasoa ai ma nisi) – pe avea foi ma fale mo ia lava. Ua vaai i luma e faaavanoa se vaega o le fale e talia ai aiga ma uo. Ua fai ana fuafuaga mo le lumana’i. E lē naunau (taimi nei) o ia i ni fuafuaga tetele po o ni ‘mamanu iloga’ pei o le tele o i tatou ona fia matamata i polokalame mo fale toe faaleleia. Peita’i ua i ai ona manatu mo le teuteuina, itu-āiga meafale e fialia i ai, o le faaleleia o le faataotoga e alia’e mai i se aso a sau. E foliga mai ua fai ma natura o le tagata soifua e faananau ona o le faaleleiga o le mea e nofo ai.

A e ui i lea, i totonu o aiga, ua sili atu nai lo le teuteuga o se fale po o lona toe faaleleia. Ua sili atu foi nai lo le su’e-faasili mo le lumana’i po ua pei o le fale matamata ua sili ai le faatusa nai lo le nofo lelei. O le aiga o lo tatou nofoaga o ‘sulufaiga’ ma o le ogatotonu o le agalelei faa-talimālo. O le agalelei faatali-mālo e avea ai o tatou aiga e pei o se ‘nofoaga paia’ pei o soo se itu-āiga lotu po o nofoaga tapua’i ma se mataaga o tagata o soo se faatuatuga ma e leai se faatu’iese, ona o la tatou faafeiloaiga ma le tufa faasoa atu, ona o le agalelei ma le alofa tunoa o le Atua o loo nofo i totonu ia te i tatou.

O le ‘mamanu iloga’ lea, o Iesu i lana misiona o le mafutaga i le la’oái ma le tasi ua Iama’omia ai i tatou e faatusaina. Ua faaalua ia Iesu Keriso le tunoa o le alofa o le Atua i le lalolagi. O le tāua o le fale e sulufa’i i ai tagata puapuagatia aemaise i latou ua pologa i le agasala. E lē o itu-aiga fale a’o le anofale le faamamafa, auā o loo taoto ai le ola e maua mai i mafutaga ta’itasi i totonu o se fale. Auā, o le a se taua po se matagofie o se maota po o se

NOVEMA 24, 2019

‘ASO FAAFETAI’

MATAUPU 12:

LE LALOLAGI UMA E, - VIVI’I! (All the Earth – Praise!).

TUSI FAITAU:

SALAMO 100: 1 – 5

SINI:

Ia malamalama le fanau o le galuega tausī a le tagata i aso ma taimi uma lava; o le vivi’i i le Atua.

FAATOMUAGA: I le lalolagi e faamalosia ai feávea’i o tagata, faaituau ma le si’omaga lautele ua faailoga tagata, atonu ua leai se eseese ma le matautia o le ola ua aveesea le fiafia, vivi’i ae maise le agaga faagae’etia. I se vaaiga faa-le lalolagi, o loo valaauina e le fatu-pese Eperu tagata uma mai vaega ma tupulaga eseese o le olaga. Ia alalaga ma fai pese ga tagata lalolagi uma, ia vivi’i ma faamanūina le Atua. Le lalolagi uma e, se’i faafoi atu se taulaga i le pese faafetai ma le vi’iga e sulaina ai le tunoa o lona alofa ma le faapalepale o le agalelei o le Atua foafoa.

FESOASOANI MO LE MATAUPU: E mafai ona tatou faata’ita’i i le mataupu o lenei taeao, se’i o tatou vaai po o a itu-aiga tagata e maua mai i apoapoaiga o le ola vivi’i i le Atua. O loo amata, “Ia alalaga i le Alii le lalolagi uma,” o lona uiga e faatatau i le lalolagi atoa po o tagata uma o lenei olaga. O tagata uma o auaua ia a le Alii ma e ao ona vivi’i ma le fiafia, o le galuega vivi’i e faia ma le loto faagae’etia ma le olioli. O le tagata e vivi’i ma le fiafia e sa’oloto ma olioli pei o la le Fai-Salamo. O le apoapoaiga ia galulue ma le fiafia, e vivi’i so’o se tagata i le Alii auā o Ia lava o le Atua. O le Atua na faia mea lelei mo le tagata, o le nu’u o Isaraelu o le lafua mamoe ua Ia fagina. O le matāfaioi tausī lea a le tagata ola o le vivi’i atu i le Atua e lē auua.

O loo faaleo ai le mafuaga tonu e ao ai ona ola vivi’i mea uma aemaise le tagata i le Atua Foafoa. O le manatu ‘e ao ona vivi’i le mea na faia i Lē na faia o ia.’ O le ola tapua’i foi lea o le tagata i le Atua. Aua nei galo le vi’iga pe a ulufale i faitoto’a e tapua’i. Ia fo’i mai i ona lotoā ma le pese fiafia i vi’iga o le Atua. O loo talosia le ulufale ma le ulufafo o le tagata ina ua mae’a se faamoemoe sa feagai ai. O le viiga ma le faamanū i le Suafa o le Atua Silisiliese, o Lē tatau ma onomea i ai le vi’iga a le tagata soifua. O le mafuaga lena o le agaga faafetai, e tatau ona vi’ia le Atua e ou mea uma ma na Ia faia mea uma i lona mataisau poto.

GALUEGA FAATINO: (Salamo 100: 1 – 5) Ia faatumu mai laina i upu sa’o:

1. Ia outou _____ atu i le Alii ma le fiafia; o mai ia outou i ona luma ma le _____.
 - a. o / pese
 - b. auaua / alaga fiafia
 - c. alalaga / viiga
 - d. E leai se tali sa’o.
2. O Ia na _____ i tatou, ua fai i tatou mona; o lona nuu i tatou, o le _____ ua Ia fagina.
 - a. faia / lafua mamoe
 - b. fagina / fanau
 - c. tulia / nu’u
 - d. E leai se tali sa’o.

TESEMA 08, 2019

MATAUPU 14: UA FAUSIA E LE POTO, (Built by wisdom).
TUSI FAITAU: SALAMO 144: 9 – 15
SINI: Ia malamalama le fanau o mea uma na faia i le mata'isau poto o le Atua Foafoa.

FAATOMUAGA: O le uiga lea o le upu 'fausia' (created): o le foafoaina po o le faia lea i le poto o le Atua Foafoa. O loo manino le manatu i soo se kerisiano pei o le molimau a le fai-Salamo, o le Atua na fausia pe na foafoaina mea uma i lona mata'isau poto mai le amataga. O le foafoaga paia lea a le Atua e aofia ai ma le tagata; o le 'palealii' o lana galuega na fausia e lona lava poto. O le mea lea e uiga ese ai lava le tagata mai mea uma o le foafoaga, e tasi lava oe. O le manatu e ui ina fausia mea uma o le foafoaga i le 'Malelega' po o le Fetalaiga a le Atua, ae le'i faatauv'a ona faia i tatou e le poto o le Atua. (*We were special created by God*). O le mea foi lea ua iso ai le poto o lenei lalolagi e tausaili le mamanuina e le Atua o le ola o le tagata. Na amata mai lava i le ulua'i tagata se'i o'o mai le gafa ia te oe ma a'u i lenei vaiseuga o le olaga.

FESOASOANI MO LE MATAUPU: O le áapa atu i laau po o áa o aiga ua faatupula'ia le mana'omia i nei foi vai-tausaga. O se mea na ou lē manatu mamafa i ai ma se tasi o tuafafine i se ala maulalo ma ua avea le upega tafā-i-lagi ma ala ua faigofie ai ona maua ia sailiga. I le vaitau o le maoa'e o le femalaga'i ma le lalolagi e malaga ese atu (faia i filifiliga po o le tatau ai) e nonofo pe galulue ai, faata'i e mana'omia se iloa maumaututū o ai i tatou a'o fea foi tatou te o mai ai, tusa lava po o i ai ponaivi i totonu o le taulavalava. O se faavae e mafai ona tatou faia mo le lumana'i. A o a'u ou te lē mafaia ona avatu i lo'u aiga se igoa tu'ua po o se nofoaiga pei o le 'Fale o Tavita' po o 'Fale o Totoa,' faata'ita'iga ou te patino i le 'fale'. O le fausaga, peitai ane pei o se faa-see, na ola mai ai tuaā o le fale lava, o le fatāmanu ma o le faavae o lo'u olaga ma ou te faamoemoe, ia i latou o e mulimuli mai ia te a'u. O isi pou-tū o lo'u olaga ua latou atamamai tainane úo ma áumea mamae na fesoasoani mai ia te a'u i taimi o le faigatā.

E tutusa lava ma i tatou i totonu o le lotu. E pei ona fai mai le tusi a Paulo ia Efeso (2: 19-21), 'ua fausia i tatou i faavae o aposetolo ma perofeta, ia Keriso Iesu o Ia lava o le ma'a tulimanu; ua faatatauina ia te Ia le fale atoa, o loo alu a'e, ina ia fai ma Malumalu Paia i le Alii.' Ia Keriso Iesu o le fausaga atoa ua soso'o faatasi ma tupu e avea ma 'Malumalu Paia'. O alii ma tamaita'i kerisiano totoa o tuāā, o le áu Paia, o pou-tū-toa na latou fesoasoani ia te i tatou. Na latou molimauina ma filigā e faamalosiáu ia te i tatou, na tautigā mo le taimi nei ina ia simā ma faamautū le faavae mo a taeao ma lo tatou lumana'i.



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org